

Kommunalbestyrelsinut



Qinersineq 2025

IMAK-imit Partinut qineqqusaartunullu kaammattuutit IMAK-ip Sinniisoqarfianit Tunngavissat iliuusissallu pillugit aalajangersarneqartunit aallaavillit minnerunngitsumillu atuarfippassuarni ataatsimiisitsisarnitsinnit ilaasortatsinnit IMAK-imut apuunneqartartut.

Atuarfinnik qulaaniit aqutsineq atorneqarpallaarpoq

Inatsisitigut sinaakkusiisoqareeraluartoq kommunillu anguniagassiinerisigut sulineq ingerlanneqaraluartoq politikkerit atuarfiup inerisarnissaanut imminnut qitiusutut inissittutut ittarput atuarfillu qulaaniit aqunneqartutut aamma inissillugu. Naak inatsisitigut sinaakkusiussat iluanni kommunalbestyrelsillu sinaakkusiussaasa iluini atuarfiup siulersuisuisa anguniagassaliornikkut nalilersuisarnikkullu ingerlatsinissaat inatsimmi siunertaasoq.

Atuarfinni pisariaqartinneqartoq tassaavoq atuarfiit, ilinniartitsisut, angajoqqaat atuartullu suliniutaasa ineriartortikkusutaasalu politikkerinit tapersersorneqarnissaat inissaqartinneqarnissaallu. Tamannalu kommunalbestyrelsinit pimoorunneqartariaqalerpoq.

Inatsisip siunertaa tamakkiinerusumik piviusunngortinneqassappat, ilinniartitsisunngorniartarneq, ilinniartitsisut pikkorissartarnerat ilinniaqqittarnerallu kiisalu ilisimatusartunit atuarfimmik misissuinerit aqqis-suussaasumik ineriartuutaasumillu ingerlasariaqarput.

Pikkorissarnernut ilinniaqqinnernullu akimmiffiit

IMAK-imi siulersuisut aammalu allaffeqarfimmi sulisut ukiut kingulliit marluk sinerissami angalanikuupput. Ilinniartitsisut pisortallu naapitatta meeqqat atuarfianneersut amerlanerpaartaasa ilinniaqqittarnerit pikkorissartarnerillu ataavarnerusut maqaasivaat.

Pikkorissarnissanut ilinniaqqinnissanullu akimmiffiit annersaraat kommunit pikkorissartussanut ilinniaqqinniartunullu killegartitsinerujussui. Ilinniartitsinermik Ilisimatusarfimmit nalunaarutigineqarpoq ilinniartitsisut ilinniaqqiffissatut pikkorissarfissatullu qinnutigisaat pilersinneqartaraluartut kisiannili atuarfiup pisortaaniit ingerlatsivimmiilluunniit qinnuteqartut itigartinneqartatut.

Ukiuni makkunani nunatsinni avatitsinnilu perorsaannermut tunngasutigut ineriartorneq allanngoriartornerlu taama sukkatigitillugit pikkorissartuarneq ilinniaqqinnerlu aqutissaapput.

Atuarfinnik inerisaaneq – sumiiffinni ataasiakkaani

IMAK-ip kissaatigaa, atuarfiit ataasiakkaat, sinaakkutissat ataatsimoorussat iluanni, ilinniartitsinerup pitsaassusaata ineriartortinnissaa aamma ilinniartitsinerup aaqqissugaanera, aaqqissuunnera ingerlanneralu akisussaaffigissagaat. Atuarfimmik ineriartortitsinerup aallaavigissavai meeqqat atuarfiannut anguniakkatut aalajangersakkat ingerlanneqassallunilu peqataasut tamaasa oqaloqatigalugit.

IMAK-imit isumaqarpugut, atuarfiup ineriartornissanut akisussaaffiup atuarfiit pisortaannut ilinniartitsisunullu uterteqqinneqassasoq qitiusumiillu immikkuualuttut ilanngullugit aqutsineq unitsinneqassasoq. Tassunga tunngatillugu IMAK-ip naliliisarnermi sakkussat qitiutikkusuppai, naliliisarneq atuartitsinermut ilaalersillugu, ilinniartitsisunit ingerlanneqartoq ulluinnarnilu atuartitsinermi atorneqartoq.

Sullivimmi illutatigut avatangiisit

IMAK-imit ilungersunartutut isigaarput sooq aturfippasuarini atuartut, inuusuttuaqqat, ilinniartitsisut allallu aturfimmut attuumassuteqartut pitsaanerusumik illersorunneqannginnerat.

Atuartut ilinniartitsisullu akornanni anerniluutit, astma, amikkut naajorarnerit, ungillerinerit, isikkut qanikkullu panertoornertit ullumikkut nunatsinni meeqqat aturfii atugaaqaat. Taamaattumik nunatsinni atuartorpassuit ilinniartitsisorpassuillu peqqissutsikkut navianartorsiortinneqarput, allaat inuunermi sinnerani sunniuteqarsinnaasumik. IMAK-imit pissusissamisoorsoraarput politikkerit meeqqat sulisullu illersorniarlugit imikkut iliuuseqarnissaat.



Nanortallip aturfia 2024.

Asseq: IMAK

Suliffigissaannermut tunngatillugu

Sullivimmi atukkat atugassarititaasullu suliffiit ingerlanneqarneranni isumaqartorujussuupput. Taakkuami pitsaasumik ingerlannginneri ulluinnarni sulliviup aqunneqarnerani aningaasaqarneranullu akisoorujussuanngooqqapput.

Nunatsinni suliffigissaaneq pingaarnerpaatut aallunneqartariaqarpoq. Sulisut sullivimmi ineriartortitsinermit peqataatinneqarunik piginneqataatinneqarlutillu sullivinni atukkanut ineriartortitsinissamullu isumalerujussuussapput.

Timelærerit atugaat ilinniartitsisullu ineqarnikkut inissisimanerat

IMAK-ip pisortallu kingullermik isumaqatiginninniarnernanni isumaqatigiissutigineqarpoq sinerissami time-lærerit atugaat pillugit misissuinissaq aammalu ilaasortatta sinerissami ineqarnikkut inissisimanerat pillugu misissuinissaq pingaaruteqaqisoq. Suliassat qulaani pineqartut pillugit 2022-mili IMAK-imiit Namminersorlutik Oqartussanut kommuninilu qullersaasunut eqqaasitsissutigineqattaalerput suliat aallartin-neqartariaqarneri. Ajorluartumik manna tikillugu nikeriartoqanngilaq.

Ilinniartitsisut inissaqartinniarneqarnerat utaqqiisaasumillu ineqartitaasarnerat

Ilinniartitsisut atorfinittut ilaat sivisuumik initaarnissaminnut utaqqisariaqartarput ilaallu inisianut pitsaanngilluinnartunut isertinneqartarlutik. Akerlianillu aamma illoqarfinni ilinniartitsisoq kisimiittoq atorfinikkuni ineqarnermut akiliutit qaffasimmata assoruulereerluni aallartittarpoq.

Ilinniartitsisut amerlasuut aamma nalaattarpaat inissaq piareersimanngimmat utaqqiisaasumik inissinneqarneq. Taamatut atugassaqartitaasut assigiinngitsorujussuarnik atugassaqartitaasarput ilaat utaqqiisaa allanik najugaqarteqarsinnaasarlutik ilaquttaminniinnissaminnilluunniit kaammattorneqartarlutik.

Ilinniartitsisut ukiup atuarfiusup iluani atuarfimmut allamut nooqqusaanngitsut

(Kommuneqarfik Sermersooq – Nuuk)

2024-mi ukioq aallartittoq kommunit ilaannit nalunaarutigineqarpoq ilinniartitsisut ukiup atuarfiusup qeqqinnaani atuarfinniit atuarfinnut allanut nuuttarnerat unitsinneqartoq.

Taamaaliornermut tunngavilersuutigineqarluni atuartunut eqquvallaartarnera.

IMAK-imiit isumaqarpugut taamaaliorneq meeqqanut ajornerusumik tuttoq. Ilinniartitsisoq illoqarfimmut allamut nuutsillugu ingerlaannaq atorfinitsisoqarsinnaasanngilaq inissaqartitsisoqanngimmat. Taamaalilluni atuartut eqqungaasarnerat annertunerusinnaasarluni. Taassuma saniatigut kommunimi pineqartumi ajornaquteqanngitsumik Ingerlatsivik ukiumut arlaleriarluni atuarfimmi ilinniartitsisuusunik ingerlatsivimmi atorfinitsitsisarpoq atuarfimmilu atorfinittusamut inissaqartitsisoqanngimmat sivisuumik atorfinittoqarnissaanut utaqqisoqaqqaartaarluni. Kommuni ilinniartitsisut atuarfimmi atorfimmut nuussinnaanernanut eqaannerusumik periuseqartariaqarpoq, nuuttariaqarnermummi patsisaasut assigiinngitsorpassuusinnaapput.



Asseq: IMAK

IMAK-imi siulersuisut. Siulittaasoq, Elna Heilmann, Lena Reimer, Christian Jensen siu. tullia., Lars Jensen aamma Helene Heilmann.

Kommunit meeqqat atuarfiini sipaarfiginninnerat.

Sinerissami meeqqat atuarfiini ilaasortatta kommunit assigiinngitsutigut sipaarniarnerat killilersuinerallu kipiluttunartutut misigivaat.

Ullumikkut sinerissami nalinginnaasunngorsimavoq assassornermi aammalu mernguernartulerinermi atortussarsisoqarsinnaanani, allaat sumiiffiit ilaanni sanatitsisoqarsinnaanngilaq, assassortitsisoqarsinnaanngilaq igatitsisoqarsinnaananilu.

Unalu pingaaruteqaqisoq ilinniartitsisut nammineq ataasiakkaatut fagiminnik naleqquttumik pikkorissarsinnaanerat unitsivinneaqqavoq. Tamatuma kingunerivaa atuartitsinerup pitsaassusaata naleqqukkunnaaqqalernera aammalu atuartut ataasiakkaatut fagini naleqquttumik pissarsiaqarsinnaaner ataatigut killilersorneqarmat.

Taarsiullugu KIVITSISA Webinarinik atorlugu pikkorissaanernik taallugit ingerlataat neqeroorutaapput piumasaaqatitaqanngitsut. Tassa atuarfinni aqutsisunit kaammattuisoqartarpoq ilinniartitsisoq webinarimut peqataallaqqullugu nalunaallaqqullugulu. Webinarini aningaasanik sipaarniarfittut ator neqarpallaalerpoq pikkorissarnivimmik taaneqarnaveersaartutut illuni.

Qulaani taariikkavut innersuussutigalugit IMAK-imiit isumaqarpugut meeqqat atuartitaanerannut ineriikiartuutaasinnaasut aningaasaliiffigineqarnerullutik politikkikkut tapersersorneqarnissaat piumasuseqarfigineqartariaqartut.

ATUARTUT – immikkut pisariaqartitsisut

Sineriassuatsinni meeqqat atuarfii anginerit amerlanersaat immikkut pisariaqartitsisunut specialklasseqarput. Tassa meeqqat immikkut pisariaqartitsisut atuarfimmi nalinginnaasumi inimili atuartitsiffimmi immikkoortillugit atuartinneqartarlutik. Maannakkut kommunini atuarfiit ilaasa immikkut atuartitsinermut klassinut atuartut amerlavallaat soorlu, 11-12 inississinnaasaarpaat, sipaarniarlutik. Siusinnerusukkut immikkut atuartitsinermut nalunaarut ator neqartoq aallaavigalugu klassimi amerlanerpaamik arfineq-pingasusinnaanikuupput.

Meeqqat ilinniartitsisuminnut meeraqatiminnullu siorasaarutaat sakkortusiartorput. Sakkortulluinnartumillu pisoqartillugu iliuusissaalatsisarpur.

Ilinniartitsisutut iliuusissagut nalinginnaasut nalunngilagut. Pisunili sakkortoqisuni iliuusissaaleqinarsisarpur. Meeqqat siorasaarutaat iluusaallu sakkortuut naammattoortalerpagut. Meeqqat persuttaasarpur, assigiinngitsunillu siorasaarisarlutik sakkussaminnillu angerlarsimaffimminnut aallertarlutik.



IMAK-ip Siniiisoqarfiata ataatsimiinnerani, november 2023.

Nukissatigut sillimmatit

Kommunit aalajangersarsinnaareerpaat klassini atuartut amerlassusissaata qassiutinnissaat.

IMAK-imiillu isumaqarpugut, holdikkaarinnermut tiimit atuartitsinnermut atortakkat, klassimi atuartut amerlassusissaat aamma tapersersuilluni aqqissuussinerit tapertaliussaasumillu atuartitsinerit, atuartoqatigiit nukissatigut sillimmatigisaannut naleqqiullugit perorsaanikkut naliliinerit aallaavigalugit atorluarnerusari-aqartut, atuartut amerlanerpaaffimminniitinnissaat piinnarnagu.

Atuarfiup angerlarsimaffiullu suleqatigiinnerat

IMAK-imi isumaqarpugut atuarfiup angerlarsimaffiullu suleqatigiinnerat patajaallisarneqartariaqartoq. Atuarfiup angerlarsimaffiullu suleqatigiinnerat pillugu atortussiat nutarterneqartariaqarput.

IMAK-ip atuarfiit siulersuisui qinikkat aallaavigalugit nuna tamakkerlugu angajoqqaat siunnersuisoqatigiivnik pilersitsoqassappat taperserniarpaa.



Nuummi ilaasortanik ataatsimiisitsineq, 2024.

Asseq IMAK-imit pigineqarpoq

Qulaaniit avataaniillu suliniutit

Meeqqat atuarfiinut toqqaannaq aningaasaliinerunngitsut suliniuterpasuit Naalakkersuisoqarfinnit, Aqutsisoqarfinnit allaniillu meeqqat atuarfiinut kommunit aqqutigalugit milorujussuunneqarpud; socialemut tunngasut, pinaveersaartitsinnermut, peqqinnermut tunngasut, Kalaallit Meerartaannit suliniutit, Unicefimeersut suliniutit arlallit il.il. Tamakkualu qulaaniit naalakkiutitut isaanneqakkajupput ilinniartitsisut atuartitsinissamut pilersaarutigeriigaannik allanguinermik pinngitsoornerannilluunni kinguneqartartumik.

Ilinniartitsisutut ilinniarsimasut ilinniarsimasatik aallaavigalugit ilikkarsarnermut tunngasunik immersorneqarunnaarput, taarsiullugu suleqatigiittut atuartunut ataatsimut periusissanik iliuusissanullu suliniutinik immersorneqarlutik.

Atuarfinni aqutsisut

Meeqqat atuarfiani pisortat allaffissornerujussuarmik suliaqartinneqarpud. Projekterpassuit meeqqat atuarfianut toqqaannartumik attuumassuteqanngitsut tunniussuunneqarpud, saniatigullu meeqqat immikkut pisariaqartitsisut, meeqqat inuit ikittunnguit akornanniinnissaminut pisariaqartitsisut, atuaqatigiinni amerlasuuni atuartulinni peqataatinneqarniarsarineqarpud. Pisortaasut suliat assigiinngitsorpassuit ataqatigiissarniarsarivaat piffissamik, nukissaannik aningaasaliissutinillu immikkut tunineqassanatik.

IMAK-ip suliniutiginiarpaa atuarfiup aqutsisunut allaffiata allaffissornikkut suliassanik isumaginnittussanik sulisulersorneqarnissaa.

Kommunit ilaannit atuarfiup pisortaasa suliartoraangamik asoorangamillu naqitsisalernissaat sulissutigigaat tusarlugu tupaallannarpoq. Atuarfinni pisortat 40 tiimiinnaat atuarfimiillutik sulisanngillat. Taamaattumik kommuni taamatut eqqarsartoq sulisunut tatiginninnginnermik aammalu sulianik akisussaaffimmiillu paasisimasaqannginnermik tunngaveqarsimassasorinarpoq.

Ilinniartitsisussaqaarniarneq

Meeqqat atuarfianni ilinniartitsisut ilinniarsimasut ukiuni tulluuttuni tallimani 143-it soraarninngorsinnaasut kisitsisit takutippaat. Taakkualu ukioqatigiiaat kisitsisit qaavaniipput ilinniartitsisutut ilinniarsimanngitsut atorfeqartinneqartut 39-t. Ukiuni kingullerni tallimani ilinniartitsisutut ilinniakkaminnik naammassinittartut amerlassusaat agguaqatigiisillugu 30-it missaanniipput.

Ilinniartitsisutut ilinniarlutik naammassisunit arlallit ilinniakkamut qaffasinnerusumut ingerlaqqittarput arlalissuillu ilinniartitsisutut sulinatik allami sulilertarlutik. Taamaattumik meeqqat atuarfiata kivinnissaa pimoorukkaanni aningasaliissutinik iliuuseqarnermillu malitseqartariaqarput.

Atuartut allamiut tikittut pillugit

Allamiut avataaneersut, pingaartumik kangiarniut, meerartaasa amerligaluttuinnartut atuarfinni nukinnik tigooraajartorneri eqqumaffigisariaqarpoq. Soorunami inatsit malillugu atuartussaataapput kisiannili nunatsinni ilinniartitsisussaaleqiffiusumi kommunit silimmartaarnerusariaqarput.

Fysiskertitsisoq naammaginnartumik tuluttoorinnaanngippat taava ilinniartitsisoq nutserisulerneqassava imaluunniit qanoq iliortoqassava?

Iliuuseqarfigineqartariaqarpoq.



Inatsisartut KULTurimut Ilinniartitaanermullu ataatsimiisitaliaannik ataatsimeeqateqarneq, maj 2023.

Assiliisoq: IMAK

Meeqqat ilikkariartornissaminnut naligiimmik atuarfimmi atugassaqaartitaannginnerat

Meeqqat pitsaasumik ilikkariartorfiusumillu atuartinneqassagunik atuakkat, ipadit atuakkanik atorniar-tarfiit assigisaallu kisiisa toqqammavigissallugit amigarpoq. Meeqqap ilikkariartornikkut ineriikkartornik-kullu pitsaasumik ingerlanissaa qulakkiissagaanni, fagit atuartitsinerlu eqqarsaatigalugit mernguernatunik atuartitsissutit pinngitsoorneqarsinnaanngitsutut pingaaruteqartutullu aallullugit ingerlanneqartariaqar-put.

”Angerlarsimaffimmi suliassat”, ”Timersorneq silamiinnerlu”, ”Assassorneq, ilusilersuineq, sananeq mer-sornerlu” kiisalu ”Nipilersorneq, erinarsorneq, aalaneq isiginnaartitsinerlu” mernguernartuni atuartitsis-sutini sammineqartussaapput.

Ajoraluartumik kommunimi sorlermi najugaqarneq kommunimilu aningaasatigut qanoq inissisimanera apeqqutaallutik meeqqat tamakkiisumik siamasissumillu atuartinneqarnissaat pinngitsoortinneqartarpoq. Taamaalilluni meeqqat atuartinneqarnerminni assigiinngitsunik atugassaqaartitaallutik atuartinneqalersar-put. Meeqqat atuartinneqarnissaannut assigiimmik atugassaqaartitsinissaq anguniarneqartariaqarpoq, qa-normi atuarfiit ilaanni limstiftiluunniit pisiareqqusaassanngila?

Nunatsinni taama inuttunngitsigisumi qanoq assigiinnerusumik atugassaqaartitsilluni ingerlatsnissaq ujartorneqartariaqarpoq.

